

陶雲汀先生奏疏

奏疏卷四十二目錄

江督稿

安化陶澍

起程查閱江西安徽營伍摺子

歷陳淮嵯疲困辦理竭蹶情形摺子

請復鹽政摺片

查閱安徽江西各營官兵技藝情形摺子

九江途次折回清江浦會辦奸民乞堤摺子

沿途察看水勢軍船行走道路情形摺子

籌議遴員整頓江西嵯務摺子 附片二件

請將知府服闋畱江補用摺片

請復鹽政蒙

恩訓飭覆奏摺片

會勘河湖運道籌辦情形摺子

起程查閱江西安徽營伍摺子

奏爲

敬啟

起程查閱江西安徽營伍委運司兼護鹽

政暨交卸安徽學政印務委員齋送各緣由仰
祈

聖鑒事竊查兩江總督管轄三省地方營伍例應五
年親自巡閱一次祇以公務紛繁往返動須兩
月自道光二年以來迄今已及十年前督臣等
未及前往校閱臣自蒙

恩補放兩江始因料理河漕整頓鹽務繼因三省雨
水爲災運河漫口經營賑務並節次往來清江

會籌宣洩防堵本年重運完竣後卽就近將江
鎮淮揚徐海及河漕各營分次校閱旋即趕辦
鹽務奏銷正擬事竣前往皖西適安徽學政出
缺科場期促照例兼署錄送遺才現在送考已
畢湖河事件亦經迭次札飭道將廳營相機啓
壩俾盛漲逐漸消落各工均已平穩臣乘此公
事稍可抽空卽於八月二十一起程赴江西
各營次第閱看順道安徽亦卽將經過各營調
取考校俾資整飭以仰副

聖主設兵衛民之至意仍趕緊回省辦理武闈至起

程後所有署內日行事件仍飭江寧布政使趙
盛奎代拆代行題咨緊要各案包封途中辦理
惟兩淮鹽務逐日有請呈轉運事宜刻須批發
且現當酌開壬辰新綱一切緊要事件必須立
時趕辦勢不能帶印遠出致失機宜臣謹將鹽
政印信卽委員齎交署運司俞德淵暫行兼護
以期事無曠誤至安徽學政印務前經

奏明俟送考完場卽齎交安徽巡撫兼署惟查新
任學政沈維鐸不日卽可抵任臣已委因公在
江之太平府知府唐業謙齎赴安徽俟得學政

入境信息卽齎送接受毋庸再送撫臣署理以
省往返轉折所有臣起程查閱江西安徽營伍
各緣由謹摺具

奏伏乞

皇上聖鑒謹

奏

道光十二年八月二十一日具

奏九月二十五日奉到

硃批接奉諭旨務須趕緊折回速鞫決隄人犯會同
穆彰阿從實從嚴審擬具奏萬勿耽延欽此

歷陳淮鹺疲困辦理竭蹶情形摺子

奏爲淮鹺疲敝已深竭力整頓一時尙未得有把握
歷陳實在情形恭摺覆

奏仰祈

聖鑒事頃臣承准軍機大臣字寄欽奉

上諭御史鮑文淳奏稱兩淮鹽務自去年辛卯開綱
後截至今年四月僅徵收課銀二百餘萬兩尙有
三分之二未完不知前此陶澍有何把握而以展
限八月爲請若輾轉佔礙稽延帑項出入憑何筭
算現聞揚州私梟稍已斂戢岸銷亦旺無如實運

商人僅存十餘家較前更少商人惟利是圖果協其情勢必趨之若鶩今幸有可轉之機而新商來者寥寥舊商且至日少或辦理仍有未能盡善之處等語淮揚鹺務自經整頓漸有起色商人等自應樂於承充何以仍復見少該督於現在全局情形是否確有把握如招商未見樂趨亟應就近體察督同運司設法招徠辦運者多催徵自易總期國課不致久懸奏銷無誤限期是爲至要等因欽此

臣跪誦之下惶悚曷勝伏思淮鹺疲敝久在聖明洞鑒之中臣以至愚極鈍於萬難措手之時亟

思復還舊規而力單任重辦理維艱以前證後
實難得有把握請就其顯而易見者言之淮鹽
課額甲於天下他省或數萬十數萬多者百餘
萬而淮鹽以一隅抵數省之課正雜各項數至
七八百萬兩款多額重成本增而力愈難支其
難得把握一也淮鹽運行六省其實本省惟江
寧一處安徽河南江西湖南湖北除例食蘆鹽
潞鹽浙鹽閩鹽川鹽粵鹽各府州外其餘或因
場近而食賤或因隣灌而透私所真食淮鹽者
不過中間十數府而已而猶或有腳私船私雜

出於其間地隔則志渙難齊途遠則鞭長莫及
其難得把握二也各省錢糧地丁爲重卽江蘇
財賦之區亦止二百餘萬董以兩藩司蒞以道
府州縣忙分上下尙難年清年款而鹽務以數
倍於各省之錢糧僅一運司承以不理刑名之
場使遇事則借重他人催課則責無旁貸其難
得把握三也地方水旱例有蠲緩而淮課則待
用甚緊不但不能蠲併且不能緩按期責課饑
歲猶然其難得把握四也疏銷巡緝責在文武
往往藉規費爲周旋否卽視同膜外甚者賄縱

庇私反與商人爲梗吏胥兵役層層剝削又其甚者商亦夾私官旣利其犯法以索賄商亦樂於行賄而邀利久之視同應得規費彌添本管爲法令所及裁革不難隔省則越俎憎嫌奉行莫必其難得把握五也凡此數端皆淮鹽積重之由不自今日始乃從前亦有敝壞旋跌旋起至今日而幾於一壞莫支者蓋今昔情形實亦有不同溯查

國初淮綱正課原祇九十餘萬兩加以織造銅觔等款亦祇一百八十餘萬兩迨後鹽規匣費節

省等項多由陋規改爲額款加增一百餘萬再
加外支兵餉養廉巡緝辛工書院義舉辦公等
費與發交內外各衙門及地方公務各息本按
月生息而科則數倍於原額乾隆年間已及四
百餘萬至嘉慶二十年後而淮綱每年正雜內
外支款竟需八百餘萬之多嗣是課額多懸轉
輸無力或數年始行一綱之引或銃引而全綱
不行墊欠虧挪百端支絀十數年來遂無有能
振起者譬之負擔者然日肩百觔可行一站加
以五六十觔僅行半站加至逾倍其蹶也必矣

淮鹽之做何以異是昔者唐臣劉晏權鹽初年六十萬串季年至六百萬串古今以爲美談然考劉晏以宰相出領度支合天下之鹽而權之自寶應元年壬寅受事至大歷十四年己未經營十有八年始有六百萬之課今則淮引所行不及劉晏所領之半而一歲所需逾於季年六百萬之數即使善權如晏恐亦難以蹴幾夫淮鹽之做數十餘年矣商疲課細百弊叢生奏銷不前則謬爲報効以緩正課支用無出則擅動庫款以應雜需而且批解緊急則貼色貼息不

惲剡肉以補瘡津貼彌縫則公補公攤無異桃
僵而李代庫款旣竭而典賀遂及於根窩私質
無憑而虛偽遂流爲印本其尤貽患後來者借
本認息本罄息存以數十年後之膏血拔而用
之於數十年之前而四千餘萬之舊項已空一
千餘萬之欠款仍懸毋怪乎昔枵而猶能揮霍
今歛而彌形枯窘也

臣仰承

聖訓於極疲之後亟圖整頓裁減浮費嚴挈私梟杜
糧船之夾裝懲熬鍋之侵佔而且定加觔核水
腳以固商本輕科則緩成加以紓商力長途則

護送之以防船戶之盜銷損壩則清釐之以免
匪徒之訛索凡所以爲商計者實已不遺餘力
無如舊商早已消乏百不存一新商氣力未充
尙多觀望當辛卯開綱時卽值水災自場竈以
至各省口岸無不被淹轉運艱難加以截數之
前在淮多已請未運之引在岸多存積未銷之
鹽數至百萬業經佔礙一綱勢不能如期奏銷
臣於接篆之始卽已預爲

奏明仰奉

恩旨准其稍寬時日並非臨期始有展至八月之請

也茲奏銷雖已於六月底辦竣而綱引尙有存
畱計九月初間壬辰甫得開徵以一年未竣之
綱應兩年必需之款其爲竭蹶可知臣辦理未
善焦灼難名何敢謂遠有把握自蹈欺飾惟臣
職司較繁而又遠隔一江非如廣東浙江督撫
同城就近兼管鹽政之比現又遠赴安徽江西
閱伍更恐有誤事機惟有敦飭運司就近體察
如有可以鼓舞商情之處務須設法籌辦至商
人辦鹽雖寓揚州實非揚產如西商徽商皆向
來業鹽他省亦不乏人可否仰懇

天恩勅下湖廣江西安徽等省各督撫凡行銷淮鹽之處一體招徠民商由地方官給照來場承充領運俾來者既衆轉運愈多於

國課民食均有裨益而同心協力鹽務可期起色矣所有臣接奉

諭旨查詢淮鹽商運情形謹據實遞陳現在竭力辦理各緣由恭摺覆

奏伏乞

皇上聖鑒訓示謹

奏

道光十二年八月二十一日具

奏九月二十五日奉到

硃批另有旨欽此

再鹽務向稱弊藪商情駟雜本難責以義理其
從前資本早竭掛名總商者率多坐食鹽規之
輩名爲鹽商而竝不行鹽徒爲鹽務之蠹經臣
前後革退數人奸商漸少併又革除陋規刪減
浮費不下數十萬兩物情多怨難免浮言或假
他端而側擊或張細故以旁敲因而造作言辭
百般吹楚多有謂總督管理鹽務商情隔絕遇
有作弊之事必遭懲治局外之人或致懷疑路
阻誠如該御史鮑文淳所言商情好利苟協其
情自必趨之若鶩臣非不知多爲假借或可俯

順商情冀其速至無如臣所管三省吏治軍政
以及河漕各件皆

國家重大之事

功令森嚴絲毫不容假借卽兢兢釐剔尙恐照料
難周刻深凜慄若獨於鹽商委曲周旋任其所
爲卽恐各處觀望窺見其情將威令有所難行
未免因一而廢百於公務實多妨礙伏思淮鹺
頭緒孔多迥非他省可比臣於持籌握算之事
本非所習兼以職司實繁勢難併管乘此私臬
歛戢規費裁定鹽務漸有可轉之機仰懇

天恩仍放鹽政一員來淮專司課項及轉運招徠各
務其一切川款現俱立定章程無虞多費至巡
緝之事仍交臣與例食淮鹽各省督撫認真督
緝不稍鬆勁併漕督於糧船夾帶刻加嚴緊鹽
務更可期得力其淮北試行票引法令伊始臣
自當督同委員竭力辦理俟一年之後章程大
定再交鹽政一併專管臣渥荷

特恩捐糜難報無論專管兼管總無卸肩之理惟體
察物情實因總督管理於伊等多有未便是以
觀望弗至若因循時日坐失機宜在臣雖竭勉

愚忱而於公無益實屬魂夢難安不得不據實

瀝陳伏祈

聖鑒施行謹

奏

道光十二年八月二十一日附片具

奏九月二十五日奉到

硃批專管兼管其勢甚相懸殊非爲諉卸而何如此
居心如此辦事豈公忠體國者之所爲且奉命任
事之時未思及此耶迄今乎辦無成效又思更改推
卸試問爲政之道可如是乎朕綜理庶政惟知賞

功罰罪視乎其人之所自取卽或辦理不善有負委任必先治以應得之罪再議改圖若如此朝更暮改朕不能爲而朕亦不能對天下矣朕拭目以待無可復言另有旨諭欽此同日奉到道光十二年九月初九日內閣奉

上諭前以兩淮鹽務自去年辛卯開綱後截至今年四月徵收課銀尙未完三分之二降旨詢問陶澍是否確有把握無悞限期茲據奏稱本年奏銷雖已辦竣綱引尙有存畱計九月初間壬辰甫得開徵以一年未竣之綱應兩年必需之款辦理實形

竭蹶併歷陳兩淮鹺務疲敝情形竭力整頓有難以把握者五事又以職任較繁請另簡鹽政專司課務實屬有心取巧國家設官分職豈容私意更張朕以陶澍前任江蘇巡撫擢任兩江總督於兩淮鹺務自所熟悉是以於前此請裁鹽政改歸總督管理之時降旨允准如果淮鹺疲敝實難整頓何以於奉命任事之時未思及此竝無一言陳奏迄乎兼轄兩年辦無成效又思更改不過以專管兼管其勢甚相懸殊爲此避重就輕之計非爲諉卸而何如此居心辦事豈公忠體國者之所爲朕

綜理庶政惟知賞功罰過視乎其人之自取從前
曾煥張青選福珠隆阿福森尙無推委情事祇因
辦理不善且立予罷斥况以總督兼轄鹽政辦理
較易責無旁貸何得任意推卸且據稱請飭下湖
廣江西安徽等省各督撫凡行銷淮引之處招商
領運該督既有此奏卽照所奏著湖廣等省各督
撫一體招徠民商由地方官給照到揚承充領運
俾轉運人衆可期起色試思行銷淮引之地除湖
廣外皆其所轄於緝私辦運招商等務本無掣肘
呼應較靈尙且不能辦理豈改設鹽政轉能辦理

裕如耶若如此朝更幕改不成政體朕不能爲而
朕亦不能對天下矣陶澍著傳旨嚴行申飭該督
如有天良卽振刷精神勉圖自效倘辦理不善有
負委任朕惟有執法從事治以應得之罪不能稍
爲寬貸曾燠等卽係前車之鑒凜之愼之毋自貽
誤致干重咎欽此

查閱安徽江西各營官兵技藝情形摺子

奏爲查閱安徽廬州潛山及江西九江南昌等營官兵技藝情形分別勸懲恭摺具

奏仰祈

聖鑒事竊臣於八月二十一日自江寧起程由安徽前赴江西查閱營伍緣由業經具摺奏

聞在案嗣臣行抵廬州閱廬州營官兵次抵潛山閱

潛山營官兵卽赴江西之九江校閱九江鎮標前後水師三營官兵併調南湖南康兩營官弁合看由九江至南昌省城查閱撫標左右南昌

城守三營官兵併調廣信饒州建昌瑞州銅鼓
武寧撫州鉛山浮梁廣昌都湖各營官弁合看
各營弓箭鳥鎗併合操配隊大小陣式步伐均
屬整齊連環鎗砲俱能聯貫施放三疊鎗亦齊
截合法藤牌刀矛雜技跳舞擊刺皆爲奮迅捷
便馬步箭中靶及鳥鎗準頭牽算均在六七成
以上且多有全行中靶者盤驗軍裝器械等項
亦皆完足無虧臣將技藝較優各將備弁兵當
場分別記名獎賞存記其技藝稍欠者飭令勒
限練習再臣於查閱廬州營伍入城時見該營

額外張琢楊春芳各由汛地倉忙趕到乘坐竹
兜小轎雖爲趕路而來尙非貪圖安逸之比究
屬違例有干

功令當將襄安汛額此外委張琢柘臯汛楊春芳
斥革降爲兵丁所遺襄安柘臯汛缺另行遴升
委駐又該營候補把總武舉劉萬青一同趕到
亦有小竹兜在旁並未騎馬亦應銷除候補仍
畱武舉又潛山營額外汪定江臨場稱病未到
又九江前營降補把總華得勝馬步全未中靶
且年力就衰均未便姑容應卽斥革以肅營伍

而示懲儆除照例咨部查照外臣仍諄飭各該營將備督率訓練以期一律精熟悉成勁旅仰副

聖主整飭戎行修明武備之至意所有閱過安徽廬州潛山併江西九江南昌各營官兵技藝情形理合恭摺具

奏伏乞

皇上聖鑒謹

奏

道光十二年九月十一日具

奏九月三十日奉到

硃批所辦是知道了欽此

九江途次折回清江浦會辦奸民挖堤摺子

奏爲途次接准河臣谷會奸民强挖官堤折回清

江浦會辦恭摺由驛奏

聞仰祈

聖鑒事竊照兩江總督管轄三省江西界連楚粵其
營伍業已十年不閱現屆軍政之期而地方將
弁多未周知臣於八月後因湖水消落運河水
勢已減遂乘空赴江西閱伍併順道查看安徽
各營恭摺

奏明在案九月初五日入江西境閱看九江營伍

初九日抵省城將撫標及城守各營閱畢卽擬馳赴臨江吉安併調贛州鎮標將官等併閱正在起程接准南河督臣張井咨據淮揚道王貽象稟八月二十一日夜間桃南廳屬龍窩汛十三堡地方有湖內民人聚衆持械創挖大堤併將巡兵堡夫捆縛施放鳥鎗不容搶護及至天明過水該匪徒始行散去經河臣張井星速馳往察看口門已寬九十餘丈併據兵役緝獲從犯孫在山訊係趙步堂雇令創挖希圖地畝淤高等情接閱之下不勝駭異查該處內湖外河

全賴一線單堤以爲保障今忽被匪創挖大溜
掣動則黃水灌入清湖高堰山盱益形著重危
險情形不堪設想臣已立刻飛札該處文武併
徐州壽春兩鎮徐州鳳陽兩府嚴拏各匪務獲
痛懲併咨河臣相機設法趕緊堵築至江西省
南各營將弁業已調集吉安府城候臣校閱未
便空勞往返已咨移江西撫臣周之琦馳往閱
看併將調齊各將備一併閱看分別優劣歸入
軍政案內會辦臣卽於拜摺後星夜由水路順
流直下趲程折赴清江浦會同河臣設法搶築

嚴拏匪犯跟究確情覈實嚴辦至此次決口雖
係匪徒乘夜強挖猝不及防該管文武究屬責
有專司業經河臣照例叅處臣有兼轄河工之
責未能先事預防亦屬咎無可逭相應請

旨將臣交部議處所有臣途次准咨折回清江浦會
辦工程及督拏匪犯緣由謹恭摺馳

奏伏乞

皇上聖鑒謹

奏

道光十二年九月十一日由驛具

奏九月三十日奉到

硃批另有旨欽此同日奉到九月二十三日內閣奉
上諭陶澍奏奸民強挖官堤未能先事預防自請議
處一摺陶澍著交部議處欽此又閏九月二十四
日准

吏部咨議覆兩江總督陶澍兼轄河務於奸民
強挖官堤未能先事預防自請議處欽奉

諭旨著交部議處應將兩江總督陶澍於河道總督
張井革職上減爲降三級調用毋庸查加級議
抵等因九月二十六日奉

旨陶澍著加恩改爲降四級畱任欽此

沿途察看水勢軍船行走道路情形摺子

奏爲接奉

諭旨由江西折回趕赴清江浦途次察看運河水勢
及軍船回空行走道路情形恭摺覆

奏仰祈

聖鑒事竊

臣

巡閱營伍至江西省城接准河

臣

咨會

桃南廳龍窩汛地方有奸民強掘河防黃水掣
溜入湖不勝駭異卽日折回馳往查辦由驛

奏明在案旋於九月十二日承准軍機大臣字寄

九月初三日奉

上諭龍窩汛十三堡有湖內奸民攜帶鳥鎗器械攔截行人綑縛巡兵將大堤創挖勢將全黃入湖殊出情理之外現獲從犯孫在山訊係民人趙步堂羅令挖堤尙有生員陳堂監生陳端陳光南劉開成及海金周之子併稱陳端等均有地畝多項欲挖放黃水希圖地畝受淤所供殊不足信陶澍接奉諭旨卽折回會同穆彰阿將案內人犯嚴審定擬具奏逸犯密速掩捕嚴鞫懲治倘有不實不盡致將來別生事端惟陶澍是問併察看水勢應如何相機堵築其本年回空軍船著體察情形設法

令啣尾歸次毋稍疎虞等因欽此伏查盜決河防
定律綦嚴從無掘黃入湖之事况竟敢明目張
膽攜帶鎗械細縛巡兵情節離奇尤迥非盜決
可比實屬不法已極必應嚴挈重辦跟究主使
不任一名漏網惟臣路隔二千餘里卽兼程趨
赴亦恐匪徒先逃比卽飛飭營汛及河標各營
趕緊嚴密查拏併札徐州壽春二鎮泗州宿州
等營一體畱心截拏分飭湖河各員加意防守
一面剗商河臣如禦黃順清二處吳城七堡可
開卽當次第閉壩使清水暢出刷黃以收轉敗

爲功之效兼可無誤回空臣仍晝夜兼程水陸
屢易二十三日舟抵瓜洲時江漲甫形消動洪
湖減洩下注揚關一帶涵勢甚急緯路全無茲
於二十八日始抵高郵沿途查看揚糧揚河二
廳湖河水勢汪洋一片西堤已淹東堤倍形吃
重在工員弁竭力防守幸上游來源已定攔湖
壩未開十日以來運河消水二寸車南中新等
壩因積漲尙深未能遽議興堵回空軍船南下
經過壩口難免吸溜之虞業經臣與河臣札飭
繞湖邊舊路行走避過壩口不過十餘里仍卽

入運並無妨礙現在渡黃軍船截至九月二十
五日已有五百二十餘隻當可啣尾歸次桃南
缺口黃水入湖經河臣闢展吳城七堡及東清
等壩清水暢流刷滌黃淤足減堰盱漲滿之患
一切堵築機宜容臣到浦會商辦理至挖堤人
犯現在已獲二十餘人尙有陳堂陳端陳光南
等未獲迭飭府縣營汛併咨會撫臣督飭各員
弁起緊勒掣務獲臣現距清江不過三兩程卽
當會同穆彰阿嚴行究審務得實情盡法懲治
所有臣接奉

諭旨趕緊折回清江併沿途察看運河情形理合恭摺具

奏伏乞

皇上聖鑒再臣自江西經過安徽及江境一路地方
尚俱安靜夏秋間偶有缺雨之處所損無多江
流漲浸亦多在收穫以後民情救謐堪以仰慰
宸廑謹

奏

道光十二年九月二十八日具

奏十月初二日奉到

硃批另有旨欽此先於閏九月二十日承准

軍機大臣字寄閏九月十三日奉

上諭陶澍奏由江西折回清江浦察看運河水勢及
軍船回空行走情形一摺覽奏俱悉此案陳堂陳
端等竟敢明目張膽攜帶鎗械捆縛巡兵迥非盜
決河防可比必應嚴拏重辦不任一名漏網其挖
堤人犯現已獲二十餘人尙有陳端陳堂陳光南
等未獲自應趕緊勒拏務獲嚴辦乃本日穆彰阿
等奏要犯陳端等尙未弋獲挖堤要犯自八月二
十一日起截至閏九月初六日閱時已久一任要

犯潛縱無獲實屬疲玩之至陶澍總轄地方責無旁貸著傳旨嚴行申飭將此諭令知之欽此

籌議遴員整頓江西鹺務摺子

附片二件江西巡撫會稿

奏爲江西鹺務亟須整頓籌議遴員分往疏緝以期暢銷仰祈

聖鑒事竊查江西十三府一州南昌瑞州袁州臨江吉安撫州建昌饒州九江南康十府爲行銷淮鹽引地廣信府例食浙鹽贛州南安二府及寧都州例食粵鹽而饒州與食浙鹽之廣信府及安徽之徽州府毘連建昌府與閩省之邵武府毘連吉安府與食粵鹽之贛州府毘連浙閩粵三路私鹽均侵淮界向設卡巡奉行率多不力

經臣陶澍於上年十二月奏奉

諭旨准留前任贛州府知府陳煦隨同辦理江西鹽務委令該員周歷各府察看全局籌議疏緝隨時稟商鹽道余正煥臬司劉重麟次第會詳覈辦其籌定堵緝粵私章程業經會同前撫臣吳邦慶奏奉

諭旨飭部議准移建良口市白羊坳湯村塘要卡併拆除贛縣攸鎮私開店竈粵東一路私鹽始知歛跡本年銷引截至八月覈數已較上年增多鹺事漸有起色其饒州建昌撫州三府爲浙閩

兩私浸灌來源水陸紛歧梟徒雜出因地制宜
情形稍有不同各卡積習相仍更難保無賄縱
情弊非遴委勤幹廉潔之員立定賞罰不足以
期振作現據該員陳煦勘查籌議具稟前來批
飭司道會覈詳辦伏查雍正年間浙江總督兼
理鹽政臣李衛以大使管理鹽務職任卑微不
足彈壓題請在部揀選捐納候補候選錄用之
同知通判州縣等官二十三員分發浙江辦理
鹽務俟有成效分別卽補題升以故當日鹽引
暢銷成效顯著現在江西鹽務疲敝已久亟須

明示勸懲俾資整頓除將緝私怠玩之趙元勲
李天林另摺叅革示警外應請仿照前浙江總
督李衛揀員辦理舊例畧爲變通卽就江西本
省丞倅知縣佐雜中選派分辦據該司道詳加
遴選單開瑞州府銅鼓營同知張玕候補縣丞
徐希綸等十餘員堪以差遣委用辦理鹽務臣
等查江西例銷淮引非如兩淮有分發鹽員可
用茲旣整頓岸務所開各員等均係本省實缺
候補人員情形熟悉於勘段設卡堵緝巡查訪
拏窩固催償疏銷各務自更得力應卽

奏明飭委以專責成如果實心實力辦有成效俾私梟斂迹淮引如額暢銷定當分別陞補請

旨獎勵倘有因循玩縱卽行叅革嚴懲如此明定章程俾知奮勵庶積習可以挽回於鹺務足資整飭臣等面商籌議意見相同除札委該員等分投辦理外謹合詞恭摺具

奏伏乞

皇上聖鑒訓示謹

奏

道光十二年九月二十八日具

奏十月初二日奉到

硃批另有旨欽此

再江西南昌等十府運行淮鹽內惟饒州一府
另岸專商額銷鹽二萬二千引科則每引減銀
八錢五分零緣饒岸與浙界毗連易被充斥故
特減科則兼有省商每年攤費爲緝私公用俾
得敵私暢銷以衛省岸自嘉慶二十年後饒岸
銷鹽漸形短絀近年缺額尤甚藩離不固而浙
私直侵省岸坐糜公費引復融銷徒有專岸之
名竝無專岸之實於西省全局殊有關係查乾
隆二十八年因吉安府專商不力改攤通岸綱
店有力之家帶運一切公費無藉專商賠墊曾

經

奏准在案今臣等察看饒岸情形實與昔年吉安無異應請援照辦理將饒岸額引改攤通岸綱店有力之家一體帶運無須專商賠墊仍照饒岸科則納課以勵衆商俾得合力籌款堵緝疏銷於綱岸全局有益據鹽法道余正煥具稟前來臣等覆查係屬實在情形除批飭照辦外理合附片陳明謹

奏

再前請於贛縣東河上茅店設卡緝挈潮橋東江二埠粵私嗣查茅店距贛關稍遠恐稽查聲勢未能聯絡飭據該鹽道札委前任贛州府陳煦復往會同贛州府縣詳細相度稟稱茅店地方距贛城三十里與東關聲勢未能聯絡勘得東關上泥灣下首距關里許地勢高廠而又近臨河干於該處設卡實爲扼要等情臣等查泥灣設卡與東關聲勢聯絡較之茅店更爲得力旣堵侵越贛縣之私卽杜侵越淮界之源未便拘泥前

奏致誤事機當卽飭令將原議茅店卡移建泥灣
其派委員弁兵役一切經費仍照原議辦理合
併附片陳明謹

奏

道光十二年九月二十八日具

奏十月初二日奉到

硃批另有旨欽此同日奉到閏九月十三日內閣奉
上諭陶澍等奏江西離務亟須整頓請遴員分往疏
緝一摺江西鹽務疲敝已久自應亟爲整頓該督
等酌議仿照舊例畧爲變通請就江西本省丞倅

知縣佐雜中選派分辦著照所請瑞州府銅鼓營
同知張玠候補縣丞徐希綸等准其飭委辦理鹽
務以專責成如果辦有成效准其分別請旨獎勵
倘有因循玩縱卽著嚴叅示懲俾知奮勵其另片
奏饒州府岸銷近年益形缺額有專岸之名無專
岸之實准其援照成案將饒岸額引改攤通岸綱
店有力之家一體帶運無須專商賠墊仍照饒岸
科則納課以勵衆商又另片奏前請於贛縣東河
上茅店設卡茲詳勘該處與該縣東關相距較遠
聲勢未能聯絡著准其將原議茅店卡移建泥灣

地方其派委員弁兵役一切經費仍照原議辦理
該部知道欽此

請將知府服闋畱江補用摺片

再前任贛州府知府陳煦經臣陶澍

奏蒙

恩准畱於江西鹽務差委半年以來周歷各府查勘
巡卡籌議疏緝不辭勞瘁措置諸有條理查該
員四川進士由庶吉士改授江西信豐縣調補
南昌縣陞任同知道道光六年委赴清江浦辦理
搬運漕糧及堵築灌塘事宜經前督臣琦善保
奏出力奉

旨仍回江西以知府候補道光八年仰蒙

簡任贛州府兼護南贛道印務丁憂起復

奏畱江西辦理鹽務查該員勤明幹練辦事認真
在江年久於兩江地方鹽務河漕情形均爲熟
悉且係曾任繁缺知府例應遇有繁缺請

旨簡放之員可否仰懇

天恩俯准將該員陳煦卽畱兩江補用聽候差委仍
飭令督同派委各員將現在江西鹽務疏緝事
宜一手辦竣俾臣等得收指臂之助合併附片

陳明請

旨謹

奏

道光十二年九月二十八日具

奏十月初二日奉到

硃批另有旨欽此同日奉到閏九月十三日內閣奉
上諭陶澍奏服闋知府請畱江補用等語前任贛州
府知府陳煦著准其畱於兩江補用聽候差委仍
飭令督同派委各員將現在江西鹽務疏緝事宜
辦理該部知道欽此

請復鹽政蒙

恩訓飭覆奏摺片

再臣前次覆奏鹽務歷年疲敝情形併請復設鹽政一片茲於揚州途次接奉

硃批仰承

嚴旨訓飭切責跪誦之下不勝惶悚汗流浹背伏思人臣之義分切捐糜矧臣受

恩深重尤異尋常當王鼎寶興

奏裁鹽政欽奉

諭旨交臣管理臣彼時但見鹽務頽壞

國家大事亟宜竭力支持初不暇計利害誠如

聖諭受事之始未經思及至於艱難情形屢經因事

縷陳備蒙

聖鑒而不料浮議之繁興不已與商情之悅服綦難

卽如御史鮑文淳係臣所革總商鮑有恒近族

本籍比屋而居鮑文淳未中進士時常在揚州

與鹽商來往周旋茲蠹商被革乾俸全裁從前

之每年坐食數千金數百金者俱多怨恨吹楚

殊批

多端兼聞揚人相門紙牌繪一桃樹另繪一人

此輩同堪髮指然爲國爲公之大臣祇可屏除不顧盡心籌畫爲是應死盡處之以法可也勉之

爲伐樹狀以寓咀咒其切齒於臣若此實恐因

臣爲怨府致誤全局一時冒昧具陳請易專管
爲兼管以順物情區區之愚猶冀異以行權庶
於公事或有裨益駑馬微忱未敢稍異而措詞
失體干冒

宸嚴乃蒙

鴻慈垂宥

訓誨諄諄臣惟有謹遵

聖諭振刷精神斷不敢自暴自棄致負

恩施臣之此行雖爲巡閱實亦因江西鹽引多被鄰

私侵灌皖省沿江多有搶奪淹消之案欲親往

察看情形與撫臣等籌商辦法茲雖未及偏歷業已得其大概惟漢岸浮費太甚亦經提揚審辦至淮北票鹽業已暢行從前滯岸額引原祇九萬有餘幾於片引不行茲於七八九月內已請票引十萬有零運銷過於原額似此情形淮北票鹽已有起色若得時和年豐淮南綱鹽當亦可由漸而暢足以仰副

宸厯合併附片縷陳伏乞

聖鑒謹

奏

道光十二年九月二十八日具

奏十月初二日奉到

硃批另有旨欽此先於閏九月二十日准

軍機大臣字寄閏九月十三日奉

上諭本日據陶澍奏蠹商被革乾俸全裁從前之每年坐食數千金數百金者俱多怨恨吹楚多端兼聞場人相鬥紙牌繪一桃樹另繪一人爲伐樹狀以寓咀咒其切齒若此恐誤全局請易專管爲兼管以順物情等語此輩固堪髮指然爲國爲公之大臣祇可屏除不顧盡心報國爲是應究者處之

以法可也漢岸浮費太甚自應提揚審辦務須秉
公覈實勿使虛糜至淮北票鹽業已暢行從前滯
岸額引原祇九萬有餘幾於片引不行茲於七八
九月內已請票引十萬有零運銷過於原額似此
情形淮北票鹽已有起色若得時和年豐淮南綱
鹽當可由漸而暢覽奏稍慰該督惟當振刷精神
於萬難措手之時勉之又勉俾鹽務漸有起色方
爲盡心報國之大臣切勿惑於浮議也將此諭令
知之欽此

會勘河湖運道籌辦情形摺子

欽差總河
會稿

奏爲遵

旨會勘河湖運道情形併妥籌辦理事宜恭摺覆

奏仰祈

聖鑒事九月十七二十四二十七等日疊准軍機大

臣字寄內閣奉

上諭據御史鮑文淳奏南河入湖恐妨運道請預籌
疏浚以利轉運一摺宗人府府丞潘錫恩奏全黃
入湖貽害甚鉅請急籌補救以挽全局以利漕運
一摺一摺張井前奏湖水漲滿竭力防護並籌辦堵

築一摺著穆彰阿陶澍張井會勘籌辦等因欽此
伏查江南河工運道關鍵全在洪澤一湖今桃
南十三堡地方黃水入湖如果湖內受淤過甚
勢必淤及運河所關誠非淺鮮臣張井於失事
之後屢赴該處查勘探量併將大概情形具
奏在案臣穆彰阿臣陶澍先後馳抵清江浦復公
同敬繹

聖諭併細閱宗人府丞潘錫恩原摺查該府丞與御
史鮑文淳所奏雖詳略不同總以淤湖淤運爲
可慮非目覩情形不能得其要領卽遵

旨會同查看於初三四日親往龍窩汛決口地方履勘情形該處黃水入湖卽由吳城七堡仍入黃河其間靠堤之縱橫二三十里多已受淤但該等處係在桃源縣南岸二十圖之內道光五年以前均係莊田廬墓並非湖身至黃水入湖東至吳城七堡而止旣不能入束清壩卽不能灌入運口又何能淤及淮安寶應高郵以下至吳城七堡順清河禦黃壩等處清水暢出刷滌黃淤現據河員稟稱七堡以下至海口逐段測量已刷深四五尺不等現在湖水尙存一丈九尺

餘寸較盛漲已消二尺有餘自後再見消落卽
當遵奉

諭旨次第堵閉山旰各壩河俾湖水不至分洩專力
刷黃以收蕩滌之效兼可堵閉昭關壩及高郵
四壩以期下河田畝早爲涸復至潘錫恩所稱
全黃入湖爲從來未有之事將來堵合復故勢
必全湖俱成平陸此一節最爲緊要因查嘉慶
二十五年河南儀封漫口以前如李家樓邵家
壩等處皆係全黃入湖且乾隆五十一年桃源
司家莊漫口卽在現今口門之上二里與此時

情形無異似不至淤成平陸至蕭南廳啓堤掣
溜一節當桃南失事時有請開攔湖壩者有請
開王營減壩者卽有請開蕭南之毛城鋪者臣
張井皆未敢冒昧舉行今臣等復公同商酌桃
南缺口旣已需費不貲豈可又於上游另挖口
門淹及地方益糜經費况蕭南奪溜則以下數
百里正河反致淤成平陸所稱八九十萬兩尙
不敷挑挖引河之用六年減壩厲民之事未可
援照惟查南河中滿之患總在桃南桃北外南
外北山安海防六廳之間計程三百餘里從前

啓放減壩大興挑浚徒勞無益緣其挑浚之處
在禦黃壩以下而禦黃壩以上轉更高仰清水
無從暢出現在桃南決口黃水入湖從吳城七
堡仍流入黃自吳城七堡至禦黃壩以下直至
海口凡外南北下汎及山海兩廳百餘里之內
已刷滌漸深而吳城七堡以上高仰如故卽在
桃南北下汎外南北上汎之間計程二十餘里
目下黃流入湖正河乾涸凡此高仰之處正可
施工若趁此機會就臣張井擬估抽溝之處全
行大加挑浚除去中滿之患俾禦黃壩以上漸

就底平實係一舉兩得約計所費不過四十萬兩左右於全河深有裨益如蒙

俞允容

臣

張井會同

臣

陶澍另行確估隨時具

奏辦理至於來年重運事宜惟當恪遵

諭旨察看情形如堵合之後清水暢出糧船自易行走倘仍難暢出卽將束清禦黃二壩及臨清堰等處趕緊收束修復仍行灌塘之法不致貽誤所有潘錫恩與御史鮑文淳所奏應均毋庸置議謹將臣等會勘籌議緣由合詞繕摺覆

奏併繪圖貼說恭呈

御覽伏乞

皇上聖鑒訓示謹

奏

道光十二年閏九月初六日具

奏二十日奉到

硃批另有旨欽此同日奉到閏九月十四日內閣奉
上諭前因龍窩汛決口特派穆彰阿前往南河查辦
昨據穆彰阿等會勘河湖運道情形該處黃水入
湖卽由吳城七堡仍入黃河其靠堤縱橫二三十
里多已受淤係在桃源縣南岸二十圖之內並非

湖身至黃水入湖東至吳城七堡而止既不能入
束清壩卽不能灌入運口至吳城七堡順清河禦
黃壩等處清水暢出刷滌黃淤自七堡以下至海
口已刷深四五尺不等俟湖水再消卽可堵閉山
盱各壩河俾湖水專力刷黃兼可堵閉昭關壩及
高郵四壩俾下河田畝早爲涸復並查明乾隆五
十一年桃源司家莊漫口卽在現今口門之上二
里與現在情形無異其不至淤成平陸尙屬可信
其吳城七堡至禦黃壩以下直至海口百餘里內
刷滌漸深惟吳城七堡以上高仰如舊卽在桃南

北下汛外南北上汛之間計程二十餘里現當正
河乾涸正好趁此機會估辦抽溝大加挑浚約計
所費不過四十萬兩著陶澍張井相機妥爲籌辦
至回空軍船截至閏九月初五日止已渡黃者計
一千三百餘隻本年歸次不誤惟來年重運仍著
陶澍等察看情形如堵合之後清水竟能暢出卽
復舊規倘仍難暢出卽將束清禦黃二壩及臨清
堰等處趕緊收束修復仍行灌塘之法不許貽誤
其挖堤人犯竟敢明目張膽攜帶鎗械捆縛巡兵
迥非盜決河防可比必應嚴拏重辦著穆彰阿會

同陶澍將現獲各犯並嚴緝未獲首犯悉心研鞠
從重究辦其在工失事員弁亦應於定案時治以
應得之咎不得因全河大局無碍稍存寬縱欽此